

आकाशवाणी जयपुर-अजमेर  
प्रादेशिक समाचार

- प्रधानमंत्री नरेन्द्र मोदी घाना की संसद ने संबोधित कीना- कह्यो- दुनियाभर मांय चाल रही तणा-तणी बीचे भारत रो लोकतंत्र आस की किरण
- मुख्यमंत्री भजनलाल शर्मा कह्यो-राज्य सरकार हर पात्र जणा ताई सरकारी योजनावां रो फायदो पूगावणो तैय कीनों
- आला आईपीएस अहलकार राजीव शर्मा राज्य रा पुलिस महानिदेशक ओहदा रो कामकाज संभाळ्यो अर
- प्रदेश मांय चौमासा की बिरखा जारी-आज 31 जिलां मांय बारिश रा आसारं

000

प्रधानमंत्री नरेन्द्र मोदी आज घाना की राजधानी अकरा मांय वठे की संसद ने संबोधित कीनां ई मौके वे कह्यो के सम्मानित सदन ने संबोधित करता थकां वां ने घणो गर्व महसूस व्हे रह्यो हैं श्री मोदी कह्यो के घाना ऐड़ी जमी है जो लोकतंत्र की भावना ने भावना ने आगे बधावे हैं वे कह्यो के दुनिया रा सब ऊं मोटा लोकतंत्र रा नुमाइन्दा रा तौर ऊं वे भारत रा 140 करोड़ लोगां की सद्भावना अर शुभकामनावां लाया हैं

.....

प्रधानमंत्री घाना की उपराष्ट्रपति जेन नाना ओपोकू-अग्येमांग सागे क्वामे नक्रूमा मेमोरियल पार्क रो दौरा कीनों श्री मोदी पांच देशां की यात्रा रा तैत आज रात त्रिनिडाड अर टबैगो पूगोलां वां रो वठे रा राष्ट्रपति क्रिष्टीने कार्ला कांगलू अर प्रधानमंत्री कमला प्रसाद बिसेसर सागे बातचीत रो कार्यक्रम हैं ई सागे ई दोन्यू देशां रा रिश्ता मजबूत बणावण रा बारा मांय ई विचार कर्यो जावेलान

000

लोकसभा अध्यक्ष ओम बिरला आज हरियाणा रा मानेसर मांय राज्यां अर केंद्र रा राज वाळा प्रदेशां रा शहरी स्थानीय निकायां रा अधिकां रा पहला राष्ट्रीय सम्मेलन रो उद्घाटन कीनों दो दिन रा ई सम्मेलन रो मुद्दो है-**संवैधानिक लोकतंत्र और राष्ट्र निर्माण को मजबूत करने में शहरी स्थानीय निकायों की भूमिका** उद्घाटन भाषण मांय श्री बिरला कह्यो के शहरी स्थानीय निकाय लोकतंत्र रा सब ऊं मजबूत खंभां मांय ऊं एक हैं वे कह्यो के आं संस्थावां ने मजबूत बणावण रो जनता की उम्मीदां पूरी करण मांय मदद मिलेलां लोकसभा अध्यक्ष कह्यो के देश की लोकतांत्रिक संस्थावां ने मजबूत करण की सगळा की जिम्मेदारी हैं

.....

ई सम्मेलन मांय विकसित भारत 2047 रो लक्ष्य हासिल करण सारू शहरी स्थानीय निकायां रा योगदान अर महिलावां ने मजबूत बणावण रा मुद्दां माथे ई चर्चा करी जा रही हैं

000

मुख्यमंत्री भजनलाल शर्मा कह्यो है के पंडित दीनदयाल उपाध्याय अंत्योदय संबल पखवाड़ा रो मकसद समाज रा आखिरी छोर रा लोगां ताई संबल पूगावणो हैं श्री शर्मा आज सवाईमाधोपुर जिला रा बालेर मांय राख्यी ज्या शिविर मांय बोल रह्या हां वे कह्यो के राज्य सरकार रो मकसद हर एक पात्र जणा ताई सरकार की योजनावां रो फायदो पूगावणो हैं मुख्यमंत्री कह्यो के गरीब, मजूर, किसान अर महिलावां रो विकास ई प्रदेश रो विकास हैं

.....

पंडित दीनदयाल उपाध्याय अंत्योदय संबल पखवाड़ा रा तैत लगाया जा रह्या शिविर जनता सारू मददगार साबित व्हे रह्या हैं आं रे मार्फत पीवण रा पाणी, स्वास्थ्य अर राजस्व ऊं जुड़्या बरसां ऊं चाल रह्या मामला मौके ई निपटारा जा रह्या हैं पेश है

.....

000

आला आई.पी.एस. अहलकार राजीव शर्मा आज प्रदेश रा पुलिस महानिदेशक ओहदा रो कामकाज संभाळ लीनों ई पाछे मीडिया सागे बातचीत करता थकां श्री शर्मा कह्यो के वे जनता रो राजस्थान पुलिस माथे भरोसो बणायो राखण री कोशिश करेलां डी.जी.पी. कह्यो के समाज रा सगळा तबका ने बराबर न्याय दिरायो जावेलां

ध्यानजोग है के श्री शर्मा ने पुलिस सेवा रो तीस साल ऊं बत्तो अनुभव हैं वे हाल तांई नई दिल्ली मांय ब्यूरो ऑफ पुलिस रिसर्च एंड डेवलपमेंट रा महानिदेशक रा तौर ऊं सेवा दे रह्या हां श्री शर्मा राजस्थान मांय भ्रष्टाचार निरोधक ब्यूरो, राज्य आपदा मोचन बल रा महानिदेशक अर राजस्थान पुलिस अकादमी रा निदेशक रा तौर ऊं ई काम कर चुक्या हैं

000

प्रदेश मांय आज ई केई ठौड़ां मेह बरस्सों पाली अर बालोतरा मांय बिरखा पाछे सड़का माथे पाणी भर ग्यों जालौर जिला रा सांचौर, रानीवाड़ा, भीनमाल अर आहोर मांय झमाझम बरसात व्हीं राजधानी जयपुर अर हनुमानगढ़ मांय कटे-कटे पाणी बरस्सों मौसम विभाग आज प्रदेश रा 31 जिला मांय बिरखा व्हेवण रा आसार जताया हैं आं मांय ऊं कुछ जिलां सारू ऑरेंज अलर्ट ई जारी करी ज्यो हैं जयपुर अर बीकानेर संभाग मांय कटे-कटे बरसात री संभावना हैं कोटा, उदयपुर, अजमेर अर जोधपुर संभाग रा कुछ हलकां मांय आज ई भारी ऊं घणी भारी बारिश व्हेवण रा आसार है, जद के जयपुर अर बीकानेर संभाग मांय कटे-कटे बरसात री संभावना हैं मौसम केन्द्र जयपुर रा निदेशक राधेश्याम शर्मा बतायो के राज्य रा ऊगणी हलका मांय आवता चार-पांच दिन लगातार बरसात व्हेवण रा आसार हैं ई सागे ई कटे-कटे भारी ऊं घणी भारी बारिश व्हे सके हैं

.....

चौमासा री बिरखा ऊं राज्य रा छोटा-मोटा नदी-नाळां मांय मोटी तादाद मांय पाणी आ रह्यो हैं 22 बंधा बूता रा आधा ऊं बत्ता भर ग्या हैं कोटा रा राणा प्रताप सागर अर जवाहर सागर ऊं कोटा बैराज मांय पाणी री भरपूर आवक व्हे रही हैं बैराज रा चार दरुजा खोल र 53 हजार क्यूसेक पाणी छोड़्यो जा रह्यो हैं चोखी बिरखा पाछे किसान खेतां मांय साखा री बुआई सुरू कर दीनी हैं हनुमानगढ़ मांय धान री रोपाई रो काम सुरू व्हे ग्यो हैं

000

राज्य मांय चलायी जा रही पंडित दीनदयाल उपाध्याय गरीबी मुक्त गांव योजना रा पहला दौर मांय 5 हजार गांव चुणी ज्यो हैं आं गांवां मांय चुणी ज्यो गरीबी री लकीर ऊं नीचे बसर करण वाळा पिरवारां री माली मदद सारू तीन सौ करोड़ रुपया खर्च कर्या जावेलां ई दौर रा तैत आं गांवां मांय 30 हजार ऊं बत्ता बी.पी.एल. पिरवारां रो सर्वे कर लियो ज्यो हैं सर्वे रा आधार ऊं हर गांव सारू 'गरीबी मुक्त गांव कार्य-योजना' बणायी जा रही हैं खुद री कोशिशों रे पाण गरीबी री लकीर ऊं ऊंचा उठबा वाळा पिरवारां ने मान रा तौर ऊं इक्कीस हजार रुपया दिया जा रह्या हैं अंत्योदय संबल पखवाड़ा रा तैत ऐड़ा पिरवारां रा बैंक खातां रो सत्यापन कर्यो जा रह्यो हैं योजना रा तहत बी.पी.एल. पिरवारां ने खुद रा काम-धंधा सुरू करण सारू 1 लाख रुपयां तांई री मदद दी जावे हैं

000

राज्य मांय खास खनिजां रा 12 ब्लॉक री ई-नीलामी री प्रक्रिया सुरू व्हे गयी हैं आं मांय लेड, जिंक, आयरन अयस्क, लाइमस्टोन, फ्लोराइट अर कॉपर समेत खास खनिज शामिल हैं खान अर भू-विज्ञान अर पेट्रोलियम विभाग रा सचिव टी. रविकान्त बतायो के आं 12 ब्लॉक्स मांय ऊं आयरन रो 1 अर लाइमस्टोन रा तीन ब्लॉक री माइनिंग लीज सारू केन्द्र सरकार रा एम.एस.टी.सी. पोर्टल रे मार्फत नीलामी करी जा रही हैं 8 ब्लॉक री कंपोजिट लाइसेंस सारू ई आ प्रक्रिया चालू हैं श्री रविकान्त बतायो के लारला साल सब ऊं बत्ता 34 मेजर मिनरल ब्लॉकां री नीलामी कर र राजस्थान देश मांय अव्वल रह्यो हों

000

अमरनाथ तीर्थ यात्रा आज सुरू व्हीं 38 दिन री आ यात्रा दक्षिण कश्मीर रा अनंतनाग जिला मांय पहलगाम अर मध्य कश्मीर रा गांदरबल जिला रा बालटाल ऊं सुरू व्हीं दोन्यू गेलां माथे हिफाजत रा करड बन्दोवस्त करी ज्यो हैं श्रीअमरनाथ जी री पवित्र गुफा कश्मीर हलका मांय हिमालय पर्वत माथे बारह हजार सात सौ छप्पन फीट री ऊंचाई माथे मौजूद हैं

000